

Budgets-Diskussiounen Budget 2021 vun der Gemeng Diddeleng

Jos Thill, Gemengerot vun déi Lénk, huet d'Majoritéit geluewt fir hir laangjäreg virsiichteg Finanzgestioun; d'Diddelenger Gemeng huet praktesch keng Schold, eng excellent Ausgangspositioun elo an Zäiten vu Covid-Kris.

Mär begréissen och, datt den Niveau vun den Investissementer héich gehale gëtt, e. a. mat Investitiounen an d'Crèchen, d'Maisons relaisën an an d'Schoulen.

Trotzdem hunn déi Lénk de Budget 2021 ofgeleent, haaptsächlech aus zwee Grënn :

Um Niveau vum **Wunnensbau zu abordable Präisser** mécht d'Majoritéit vill ze wéineg : nëmme 10 % vum Gesamt-Invest 2021 gi benotzt fir soziale Wunnensbau, obschons datt de Staat dee mat 75 % vum Invest ënnerstëtzt. Wéint de staatlechen Bähëllef gëif d'Gemeng souguer nach Geld verdingen mat der Vermietung vun esou Wunnengen, souguer bei engem ganz soziale Loyer vun nëmme 10 € / m².

Esou en Investissement wär also kengesweegs eng Belaschtung fir di zukünfteg Generatiounen, mee au contraire en Atout, e Patrimoine.

Leider ass di Diddelenger LSAP och net bereet, et d'selwecht ze man wéi d'LSAP zu Dikkrech an an der Stad, nämlech **d'Grondsteuer op onbebautem Bauterrain drastesch erop ze setzen**; zu Diddeleng däerf also weider fläisseg spekuléiert ginn.

Och um Niveau vun der **Installatioun vu Fotovoltaïk-Anlagen** op neie Gebeier mecht d'Majoritéit net genuch (Beispill : neie Sportkomplex Strutzbiërg) ; och déi Investitiounen géife méi Geld erabringen, wéi se es kaschten, a wäer wichteg fir méi crédibel ze sinn, wa mer froen, datt d'Nuklearzentral Cattenom stellgeluecht gëtt.

Jos Thill, Gemengerot déi Lénk